

TEZAUUR LITURGIC

19 MARTIE

ACATISTUL SF. CNEAGHINE SOFIA OLELKOVICI DE LA SLUŢK II



MOSCOVA, 2000



Акафист святой праведной Софии Слуцкой

Кондак 1

Избранную от рода князей Слуцких и Киевских
и нетлением мощей прославльшуюся,
омраченным языком заблуждениями прелести
божественный свет облиставшую, ты, святая
Софие, песнями почитаем. Ты же, яко имущая
дерзновение ко Господу, от всяких нас бед
свободи, да зовем ти:

Радуйся, Софие, земли православныя радости и
утверждение.

Икос 1

Ангелов Творец и Господь Сил избра ты, святая
Софие, от чрева матерня, яко поборницу и
заступницу веры православныя на земли
Слуцстей, сего ради мы зовем ти сие:

Радуйся, веры православныя заступнице.

Радуйся, за нас пред Богом ходатаице.

Радуйся, мудростию духовною сродники своя
удивившая.

Радуйся, землю Слуцкую сохранившая.

Радуйся, древо чудоточное рода древняго.

Радуйся, саде земли обетования.

Радуйся, звездо светозарная.

Радуйся, лозо добродетельная вертограда Христова.

Радуйся, святыни чистое жилище, Богом зданное.

Радуйся, радости исполнение.

Радуйся, цвете смирения.

Радуйся, добродетелей украшение.

Радуйся, Софии, земли православных радости и утверждение.

Кондак 2

Видяще людие православнии, яко сила Божия в немощи твоей совершается, егда осиротела еси, Отцом Небесным и Материю Божией не оставлена была еси, взываху к Богу: Аллилуиа.

Икос 2

Разум недоразумеваает разумети, како ты во младенстве своем явися помощница и покровительница людем православным, егда покорися воле опекунов твоих, яко воле Божией, и изволи мужа имети, мы же взываем ти сице:

Радуйся, детище, всякия благодати исполненное.

Радуйся, во младенстве осиротевшая.

Радуйся, злым людем на воспитание отданная.

Радуйся, любовью злобу человеческую победившая.

Радуйся, кротость и смирение явившая.

Радуйся, надежду на Бога положившая.

Радуйся, в послушании воспитанная.
Радуйся, нас послушанию научающая.
Радуйся, в бедах и напастех скорая помощнице.
Радуйся, младенцев и сирот добрая
хранительнице.
Радуйся, веру и любовь стяжавшая.
Радуйся, всем просящим помощь подающая.
Радуйся, Софие, земли православныя радости и
утверждение.

Кондак 3

Силу веры твоея нам являя, новое испытание
посла тебе Господь, егда опекуны твои, хотяще
обручение расторгнути, вызваша брань с князем
Радзивиллом, ты же, праведная Софие, единому
Богу открывала еси сердце свое, молящи о мире
и взывающи: Аллилуиа.

Икос 3

Имуще смирение велие, от юности посягнувши
за иноверца, бысть княгиня София истинная
заступница веры православныя, основательница
монастырей, строительница церквей на земли
Слуцстей, сего ради зовем ей сие:
Радуйся, храмов Божиих зиждительнице.
Радуйся, обителей иноческих попечительнице.
Радуйся, верность Церкви и стране
сохранившая.
Радуйся, заповедь любви не нарушившая.

Радуйся, суетную мудрость посрамившая.
Радуйся, заботу о людех положившая.
Радуйся, молитвы к Богу приносящая.
Радуйся, под покровом Божия Матере живущая.
Радуйся, страдания смиренно претерпевшая.
Радуйся, о ближних твоих не забывшая.
Радуйся, княжество твое венцем духовным
увенчавшая.
Радуйся, веру православную укрепившая.
Радуйся, Софии, земли православныя радости и
утверждение.

Кондак 4

Бури и нестроения претерпе земля Белорусская,
егда врази льстивии хотяху принудити люди
православныя ко унии, и мы не разумеем, како
вера твоя велия сохрани землю Слуцкую от
ересей и расколов в чистоте Православия, еже
видяще, благодарственно вопием Богу:
Аллилуиа.

Икос 4

Слыша житие твое, страданьми исполнено,
восхваляем труды твоя, во славу Божию
понесенныя по защите правоверия. Ты стена
нерушимая еси для Церкви Христовы на земли
Слуцстей, и мы, взывающе, вопием Ти сице:
Радуйся, страдания претерпевшая.
Радуйся, плоды бессмертия стяжавшая.

Радуйся, святых отцев предания сохранившая.
Радуйся, веру Христову прославившая.
Радуйся, щите благочестия.
Радуйся, мечу на злочестие.
Радуйся, Закон Божий утвердившая.
Радуйся, дары Духа Святаго стяжавшая.
Радуйся, образ кротости показавшая.
Радуйся, ленивых подвигнувшая.
Радуйся, от мятежа и брани защищающая.
Радуйся, от гибели избавляющая.
Радуйся, Софии, земли православных радости и утверждение.

Кондак 5

Боготечней звезде уподобилася еси, Софии, яко многая приведе ко Христу, ищущия спасения, и соделася аки мати премудрая людем православным, защита их и покров, темже убо и мы вопием Богу: Аллилуия.

Икос 5

Видя в тебе, княгине Софии, заступницу благочестия, краль издаде грамоту не принуждати христиан православных ко унии на земли Слуцстей, мы же радостию взываем к тебе сице:

Радуйся, милости сокровище.
Радуйся, промыслений о людех приятелище.
Радуйся, ненадежных надеяние.

Радуйся, скорбящих попечение.
Радуйся, за землю нашу пред Богом ходатаице.
Радуйся, веры нашея украшение.
Радуйся, право стоящих утверждение.
Радуйся, падающих крепкое возведение.
Радуйся, на путь верный возвращающая.
Радуйся, чудеса совершающая.
Радуйся, недуги исцеляющая.
Радуйся, враги укрощающая.
Радуйся, Софии, земли православных радости и утверждение.

Кондак 6

Проповедует весь мир христианский тебе яко звезду незаходимую на небосклоне церковнем и твое всегдашнее заступление о женах родящих, сиротах и младенцах; мы же взываем к Богу:
Аллилуиа.

Икос 6

Воссияла еси всему миру своими добродетельми, егда прияла еси болезни велия в рождении чада своего и смерть, мученический венец получивши от Бога, мы же вопием ти сице:
Радуйся, Царем Небесным возвеличенная.
Радуйся, Божиею Материю прославленная.
Радуйся, надеждою на Бога верных укрепившая.
Радуйся, венец мученический получившая.

Радуйся, женам и младенцам защитнице.
Радуйся, в рождении чад помощнице.
Радуйся, слабым утешение.
Радуйся, болящим отрадо.
Радуйся, Церкви служительнице.
Радуйся, вечныя жизни наследнице.
Радуйся, сосуде правоверия.
Радуйся, защитнице православия.
Радуйся, Софии, земли православныя радости и утверждение.

Кондак 7

Хотя прославити княгиню Слуцкую Софию,
Господь яви святость ея, открыв тоя нетленныя
мощи, мы же, радостию исполнени, прославляем
Бога, благодарно Ему поюще: Аллилуиа.

Икос 7

Новую ходатаицу показа нам Господь ты, святая
праведная Софии, прославлением нетленных
мощей твоих и чудес сиянием, от сих
исходящих. Ты ныне во граде Минске
почиваеши, пред Престолом Вседержителя
молитвы возносиши и, яко воевода, землю нашу
защищаеши, и мы вопием ти сие:

Радуйся, источнице милосердия.
Радуйся, ходатаице нашего спасения.
Радуйся, сокровище веры православныя.
Радуйся, защитнице благочестия.

Радуйся, сиянием мощей своих землю нашу просветившая.

Радуйся, всех нас себе усыновившая.

Радуйся, милость посылающая.

Радуйся, врачей благословляющая.

Радуйся, болящим чадам радость возвращающая.

Радуйся, сирот своим покровом покрывающая.

Радуйся, всех матерей упование.

Радуйся, покрове наш и заступление.

Радуйся, Софии, земли православных радости и утверждение.

Кондак 8

Странное чудо является прибегающим к блаженной Софии: молитвами своими ограждает от всякаго зла, учит мудрствовать горня, а не дольня, и пети Богу: Аллилуиа.

Икос 8

Вся еси, Софии, на небеси, но и нас не оставявши, покрываеши бо молитвою твоею люди православных, сего ради, яко скорой помощнице и хранительнице нашей, вопием ти сице:

Радуйся, жития нашего украшение.

Радуйся, чудес сияние.

Радуйся, сонм Российских святых пополнившая.

Радуйся, землю Белорусскую благодатию

исполнившая.

Радуйся, земли Слуцкия покровительнице.

Радуйся, стольнаго града Минска наследнице.

Радуйся, христианскою любовью нас
исполняющая.

Радуйся, мир в души посылающая.

Радуйся, на Бога упование возлагати нас
научающая.

Радуйся, добродетельми нас одаряющая.

Радуйся, житие наше освящающая.

Радуйся, помощь нам подающая.

Радуйся, Софии, земли православныя радости и
утверждение.

Кондак 9

Всякия беды, скорби, напасти избавлявши,
велия наша помощнице Софии, страдания душ
облегчаеши, молитве и посту научаеши всех,
хотящих жати спасение, внегда пети сие:
Аллилуиа.

Икос 9

Ветии многовещаннии недоумеют славити
святую Софию, яко малым своим житием
многих даров сподобися, мы же, восхваляюще
ю, вопием сие:

Радуйся, даров духовных подательнице.

Радуйся, в житейстем мори наша заступнице.

Радуйся, путь злу преграждающая.
Радуйся, любовью наша сердца исполняющая.
Радуйся, звездо заповедей Божиих негасимая.
Радуйся, книгу мудрости совершенная.
Радуйся, чудеса дивными просиявшая.
Радуйся, гнев Божий на милость претворяющая.
Радуйся, душу свою за ближних положившая.
Радуйся, путь в Царство Небесное указавшая.
Радуйся, маслино, елей милости изливающая.
Радуйся, винограде, благочестия вино
источающая.
Радуйся, Софие, земли православных радости и
утверждение.

Кондак 10

Спаси хотя люди православных, посла Господь
Бог тя, Софие, да твоими молитвами устроиши
житие наше, козни вражия разрушиши, ча-
родеяния и волхвования запретиши, ярость и
вражду укротиши, да чистым сердцем воспоим
Богу: Аллилуиа.

Икос 10

Стена еси всем прибегающим к тебе, Софие,
точиши бо исцеления от нетленных мощей
твоих, помощь подаеши молящимся, да и мы
вопием ти сице:

Радуйся, горлице небесная.
Радуйся, голубице Христова красная.

Радуйся, упование непостыдное.
Радуйся, любви совершенная.
Радуйся, в бедах заступнице.
Радуйся, в напастех защитнице.
Радуйся, надежду посылающая.
Радуйся, веру в Бога возвращающая.
Радуйся, от мятежа и брани соблюдающая.
Радуйся, от нужд и нищеты свободящая.
Радуйся, страсти душевныя пожигающая.
Радуйся, благая помыслы в сердце полагающая.
Радуйся, Софие, земли православныя радости и утверждение.

Кондак 11

Пения и благодарения приносим ти, Софие, уподобившейся премудрому Соломону, яко даде нам тобою Господь образ премудрости, да хваляще тя, вопием Богу: Аллилуиа.

Икос 11

Светозарней луче уподобилася еси, Софие, просвещаеши бо умы наша, помощь в учении подаеши, тьмы и вечных мук нас избавявши, да вопием ти сице:

Радуйся, младенцем уста отверзающая.
Радуйся, отроком в учении помогающая.
Радуйся, старцев укрепляющая.
Радуйся, путь к Богу указующая.
Радуйся, умы просвещающая.

Радуйся, премудрость Божию подающая.
Радуйся, целомудрию научающая.
Радуйся, к покаянию призывающая.
Радуйся, души озаряющая.
Радуйся, мудрость мира сего посрамляющая.
Радуйся, елей благодати Духа Святаго
сбравшая.
Радуйся, девам мудрым уподобившаяся.
Радуйся, Софии, земли православныя радости и
утверждение.

Кондак 12

Благодать от Бога получивши, не лиши нас
твоих молитв, Софии, да и мы сподобимся даров
небесных и земных, и Царствия Небеснаго
причастницы будем, благодаряще Бога:
Аллилуиа.

Икос 12

Поюще святость твою, Софии, восхваляем
стояние твое в вере православней, прославляем
чудеса твоя и зовем ти сице:
Радуйся, архиереев умудряющая.
Радуйся, правителем помогающая.
Радуйся, воинов укрепляющая.
Радуйся, страну нашу защищающая.
Радуйся, земли православныя украшение.
Радуйся, ангелов собеседнице.
Радуйся, славный свой род не посрамившая.

Радуйся, дела своих предков прославившая.
Радуйся, злая сердца умягчающая.
Радуйся, душу преображающая.
Радуйся, ум озаряющая.
Радуйся, дух укрепляющая.
Радуйся, Софие, земли православныя радости и утверждение.

Кондак 13

О, святая праведная мати наша Софие, княгине Слуцкая, нынешнее наше прими моление и твоими молитвами избави нас от всяких напастей и бед, болезней и скорбей, нашествия иноплеменных и будущия изми муки, да радостию Богу возопиим: Аллилуиа.
(Сей Кондак читается трижды).

Молитва

О святая праведная мати наша, блаженная княгине Софие, прими с любовью приношение веры, надежды и любви нашей и вознеси ко Господу, и яко в житии была еси помощница и заступница всем православным Христианом земли твоея, тако и ныне укрепи нас твердо и непоколебимо до смерти стояти за веру православную, согрей сердца наша любовью ко Господу и Пречистой Его Матери. Умоли Христа Бога нашего, да сохранит Церковь Свою святую от расколов и ересей, да утвердит в ней дух

правыя веры и благочестия, дух ведения и любве, дух мира и радости вечныя, да вси духом и истиною покланяются Ему, да укрепит верных в благочестии и святости, да обратит отпадших от Православныя Церкви во святая недра ея. О, святая мати, града Слуцка похвало и радости, умоли Господа, да избавит град твой и вся грады и веси Белья, Малья и Великия Руси от глада, труса, потопа, огня, меча, нашествия иноплеменных и междоусобныя брани, от смертоносныя язвы, да ниспослет правителем нашим усердие, прозорливость, мудрость и верность, да управляют и судят по воле Его, да хранят установления Святыя Церкви. Испроси всем с верою притекающим к раце святых мощей твоих мирное житие, тишину, просвещение умов и сердец, соблюди их от козней вражиих, от соблазнов мира, во зле лежащаго, и от всякия скорби и нужды, обрати нас к покаянию и исправлению, даруй заблудшим истины познание, недугующим исцеление. Сохрани нас благодатными твоими молитвами от всех врагов видимых и невидимых и огради от всякаго зла, да прославим во вся дни жизни нашея Отца и Сына и Святаго Духа и твое заступление во веки веков. Аминь.